

**UCAPAN MENJUNJUNG KASIH
OLEH BRIG GENERAL DATO' PROF DR. KAMARUDIN HUSSIN,
NAIB CANSOLOR UniMAP
SEMPENA
MAJLIS MAKAN MALAM BERSAMA DYTM TUANKU CANSOLOR
PADA 6 JANUARI 2009 DI PARK ROYAL HOTEL PULAU
PINANG.**

Bismillah Hirrahman Nirrahim

Assalamualaikum Warahmatullahi Taala Wabarakatuh Dan Salam
Sejahtera

Mengadap Duli Yang Teramat Mulia Tuanku Syed Faizuddin Putra
Ibni Tuanku Syed Sirajuddin Jamalullail, Tuanku Canselor UniMAP
dan Duli Yang Teramat Mulia Tuanku Hajjah Lailatul Shahreen
Akashah Khalil, Raja Puan Muda Perlis.

Ampun Tuanku, sembah patik mohon diampun,

Patik dengan penuh hormat dan takzim merafakkan sembah menjunjung kasih Ke Bawah Duli Tuanku berdua, berkenan berangkat bercemar duli ke Majlis makan malam yang dianjurkan pada malam yang berbahagia ini.

Sesungguhnya kehadiran Duli Tuanku berdua pada malam ini menjadikan sambutan yang diraikan lebih bermakna dan dihargai. Patik juga yakin keberangkatan Tuanku berdua akan membawa limpah berkat kepada Universiti Malaysia Perlis, dan kepada patik sekalian amnya.

Dikesempatan ini, patik selaku Naib Canselor UniMAP mewakili keseluruhan warga kerja UniMAP ingin mengucapkan selamat ulang tahun keputeraan buat Tuanku Canselor, Tuanku Syed Faizzudin Putra.

Patik sekalian berdoa semoga Allah SWT akan memanjangkan usia dan melimpahkan rahmatNya serta rezeki yang tidak terhingga buat Tuanku Canselor dan seluruh ahli keluarga Duli Tuanku. Doa patik sekalian juga agar Tuanku sekeluarga akan sentiasa disinari cahaya kebahagiaan hingga ke denyutan nadi terakhir.

Patik sekalian juga mengharapkan jalinan hubungan yang terjalin antara Tuanku Canselor dengan UniMAP akan terus mekar dan membungakan lebih banyak kejayaan dan kegemilangan untuk Universiti yang Tuanku naungi ini.

Sesungguhnya, patik sekalian berasa amat bertuah dan beruntung kerana dianugerahkan seorang Canselor yang begitu komited dan sentiasa memberikan sokongan padu dalam setiap aktiviti dan program yang dianjurkan oleh UniMAP.

Perhatian berat yang diberikan oleh Duli Tuanku terhadap UniMAP selama ini sangat-sangat dihargai dan disanjung tinggi oleh patik dan seluruh warga universiti keseluruhannya.

Ampun tuanku,

Sekian sahaja ucapan patik. Akhir kata, patik mewakili seluruh warga UniMAP ingin merafak sembah, menjunjung kasih yang tidak terhingga sekali lagi kepada ke bawah Duli Tuanku berdua kerana telah sudi bercemar duli berangkat ke Majlis Makan Malam pada malam ini.

Patik sudahi dengan wabillahi taufik walhidayah wassalamualaikum
warahmatullahi taala wabarakatuh.